

zwaiFoon



Herremättli-Clique
1921

www.herremaettli.ch

Lueg im Gsichtsbuech dini
Selfie-Fottene aa, unter
[www.facebook.com/
herremaettli](http://www.facebook.com/herremaettli)

Sujet 2015:

Im Roothuus am Zwelfi, e supergeils Selfie!

E Smartfoon muesch di aige nenne,
uff s richtig Aikoon drugge kenne,
und uff em Dyssbley sottsch di au no gsee,
denn bisch e Selfie-Profi perseel!

Sälbschtverliebt und naiv muesch sy,
denn bisch hittigsdaags voll derbyy.
Statt in d Mittagspause am Zwelfi,
machschi im Byroo schnäll e Selfie.

Bisch e Frau, denn zaigsch dr Buuse,
als Maa, s kennt aim gruuse,
zaigsch, was gisch, was hesch,
was du in de Hoose hesch.

Ob d Brischt grooss sin oder glai,
das isch doch vellig ainerlai.
Falobscht oder versteergt mit Silikoon,
zaige gheert zem guete Doon.

Als Siibesiech, zaigsch en errigiert,
und rundumme glattrasiiert.

Mit aanezuume kasch no e weeneli bschysse,
das duet mängg Stigg no uusersyse.

Mit eme Sixpägk kunsch als Maa,
bi de Empfänger sauguet aa.

Au bim-e-ne Bierfassranze-Fotti,
dänggt e mänggi: "Au, däa wott i"

Im Bundeshuus ze Bäärn,
fettelet me bsunders gäärn.
Au us em Stadthuus z Baade,
ka me Bildli aabelaade.

Au so aine wie dr Müller Geeri,
findet per Essemess e Beerli!

Wenn mir däm si Gsicht so seen,
s isch jo nit grad bsunders scheen,
denn wunderets uns nit, dass die Daame,
sich bidroot fielt, nundefaane.

Au im Roothuus z Basel gits,
und das isch kai Witz,
e mänggs sälbschtverliebts Trotteli,
wo sich nit z schaad isch fir e Fotteli.

Stell dir voor, dr Morin Guy
isch vylicht au derbyy!?
Ooni Hoose, blutt undeduure,
und oobe denn no däm si Schnuure!
Zem Gligg isch e Bildli uf em Foon,
in dr Reegel ooni Doon!

Oder am Wöschdaag ooni Unterhose,
dr Baschi Dürr in Fottipoose.

Bim Comité, s wurd is nit verstuune,
hets emänd au so Selfie-Pfluume.
Seggelmaischer kennt esoo,
ganz e neyi Bidyttig bikoo.....

Und d Moraal vo dääre Gschicht:
Zaig alles vo dir, nuur nit s Gsicht!

*Me bsuecht d'Waage- und Reggwysyte-Uusstellig bi dr
Kasäärne und d' Laddärne-Uusstellig uff em Minschterplatz.
Sy steen deert vom Määntig znacht bis am Mittwoch
demoorge.*